

ՀՐԱՆՏ ԴԻՆՔ ՀԻՄՆԱՐԿ

ՀԱՅԱՍՏԱՆ - ԹՈՒՐՔԻԱ ՃԱՆԱՊԱՐՀՈՐԴԱԿԱՆ ԴՐԱՄԱՇՆՈՐՀԻ ԿԱՆՈՆԱԿԱՐԳ

Հրանտ Դինք հիմնարկը, Եվրոպական միության կողմից ֆինանսավորվող «Աջակցություն Հայաստան-Թուրքիա կարգավորման գործընթացին. միջսահմանային կապերի ամրապնդում» ծրագրի շրջանակներում 2026 թ. օգոստոսից 2027 թ. հուլիսն ընկած ժամանակահատվածում կշարունակի աջակցել Հայաստանից և Թուրքիայից առնվազն 50 անհատի և շահույթ չհետապնդող քաղաքացիական նախաձեռնությունների՝ հոգալով նրանց միջազգային և միջքաղաքային ճանապարհաձախարհ՝ տարբեր թեմատիկ ոլորտներում աշխատանքներ և ուսումնասիրություններ կատարելու նպատակով հարևան երկիր այցելելու համար:

Ընդհանուր տեղեկատվություն

1. Հրանտ Դինք հիմնարկը 2014 թ. փետրվարին նախաձեռնեց Հայաստան-Թուրքիա ճանապարհորդական դրամաշնորհը Եվրոպական միության ֆինանսական աջակցությամբ իրականացվող «Աջակցություն Հայաստան-Թուրքիա կարգավորման գործընթացին» ծրագրի շրջանակում՝ նպատակ ունենալով ավելացնելու ուղիղ կապերը և խթանելու համագործակցությունը երկու հարևան երկրների մարդկանց միջև: Եվրոպական միության ֆինանսական աջակցության շնորհիվ Հայաստան-Թուրքիա ճանապարհորդական դրամաշնորհը հայտարարել է հայտերի ընդունման 5 փուլ 2014 թ. մարտից մինչև 2015 թ. մայիսը, որի արդյունքում ստացել է 850 հայտադիմում և ճանապարհորդական դրամաշնորհային աջակցություն տրամադրել 210 անհատի:
2. Հայաստան-Թուրքիա ճանապարհորդական դրամաշնորհը շարունակեց հայտերի ընդունումը՝ հայտարարելով 6-րդ փուլը, որը համատեղ իրականացվում էր Հրանտ Դինք հիմնարկի և Հայաստանում գործող Գյումրու «Երիտասարդական նախաձեռնությունների կենտրոն» (ԵՆԿ) ՀԿ-ի կողմից՝ Անկարայում և Երևանում Մեծ Բրիտանիայի դեսպանությունների համատեղ ֆինանսական օժանդակությամբ: 6-րդ փուլում Հայաստան-Թուրքիա ճանապարհորդական դրամաշնորհը ստացել է ավելի քան 160 հայտադիմում և ճանապարհորդական դրամաշնորհային աջակցություն տրամադրել 26 անհատի՝ 2015 թ. հուլիս-սեպտեմբեր ամիսների ընթացքում:
3. 2016-2017 թթ. Հրանտ Դինք հիմնարկը Հայաստան-Թուրքիա ճանապարհորդական դրամաշնորհին իրականացրել է Եվրոպական միության ֆինանսական աջակցությամբ՝ «Աջակցություն Հայաստան-Թուրքիա կարգավորման գործընթացին. 2-րդ փուլ» ծրագրի շրջանակներում՝ համագործակցելով Հայաստանում գործող Եվրասիա համագործակցություն հիմնադրամի (ԵՀՀ) և Գյումրու «Երիտասարդական նախաձեռնությունների կենտրոն» ՀԿ-ի (ԵՆԿ) հետ: 2016 թ. հուլիսից մինչև 2017 թ. սեպտեմբեր ճանապարհորդական դրամաշնորհը հայտարարել է հայտերի ընդունման 6 փուլ (7-12-րդ փուլեր)՝ ստանալով շուրջ 600 հայտադիմում և ճանապարհորդական դրամաշնորհային աջակցություն տրամադրելով 186 անհատի:

4. 2017-2019 թթ. Հրանտ Դինք հիմնարկը, համագործակցելով Գյումրու «Երիտասարդական նախաձեռնությունների կենտրոն» (ԵՆԿ) ՀԿ-ի հետ, իրականացրել է Հայաստան-Թուրքիա ճանապարհորդական դրամաշնորհը՝ Մեծ Բրիտանիայի և Հյուսիսային Իռլանդիայի Միացյալ Թագավորության կառավարության Հակամարտությունների, կայունության և անվտանգության հիմնադրամի ֆինանսական աջակցության շնորհիվ: 2017 թ. հոկտեմբերից 2018 թ. նոյեմբեր ամիսների ընթացքում ճանապարհորդական դրամաշնորհը հայտարարել է հայտերի ընդունման 5 փուլ (13-17-րդ փուլեր)՝ ստանալով 450 հայտադիմում և ճանապարհորդական դրամաշնորհային աջակցություն տրամադրելով 129 անհատի:
5. 2020-2021 թթ. Հրանտ Դինք հիմնարկը պատրաստվում էր Հայաստան-Թուրքիա ճանապարհորդական դրամաշնորհի հայտերի ընդունմանը Եվրոպական միության «Աջակցություն Հայաստան-Թուրքիա կարգավորման գործընթացին. 3-րդ փուլ» ծրագրի շրջանակներում, սակայն Քովիդ 19-ի համավարակով և 2020 թ. երկրորդ կեսին Լեռնային Ղարաբաղի 44-օրյա պատերազմի պատճառով հայտերի ընդունման գործընթացը հետաձգվեց մինչև 2023 թ.:
6. 2023-2024 թթ. Եվրոպական միության կողմից ֆինանսավորվող «Աջակցություն Հայաստան-Թուրքիա կարգավորման գործընթացին. հրատապ հասցեագրում» ծրագրի շրջանակներում Հրանտ Դինք հիմնարկի կողմից իրականացվող Հայաստան-Թուրքիա ճանապարհորդական դրամաշնորհը հայտարարեց հայտերի ընդունման ընդհանուր 9 փուլ և երկու երկրներից ստացավ 242 հայտադիմում: Ծրագրի շրջանակներում աջակցություն ստացավ 69 անհատ՝ 26-ը Հայաստանից և 43-ը Թուրքիայից, որոնք հստակ նպատակով և ծրագրով ճանապարհորդեցին հարևան երկիր: Ճանապարհորդական դրամաշնորհ ստացած անհատների թիվը 11-ով գերազանցում էր նախապես սահմանված թիրախը:

Ուլքե՞ր կարող են օգտվել Հայաստան-Թուրքիա ճանապարհորդական դրամաշնորհից:

7. Ցանկացած անհատ, ով Հայաստանի կամ Թուրքիայի քաղաքացի է, կամ ունի կացության իրավունք Հայաստանում կամ Թուրքիայում, ինչպես նաև Հայաստանում և Թուրքիայում գործող/գրանցված ցանկացած շահույթ չհետապնդող խումբ, նախաձեռնություն և կազմակերպություն կարող է օգտվել ճանապարհորդական դրամաշնորհից: Իրավաբանական գրանցում չունեցող խմբերն ու նախաձեռնությունները նույնպես կարող են դիմել Հայաստան-Թուրքիա ճանապարհորդական դրամաշնորհի աջակցությանը:

ա) Հայաստան-Թուրքիա ճանապարհորդական դրամաշնորհի առաջնային նպատակն է աջակցել երիտասարդական նախաձեռնություններին, ուսանողներին, բուհական ակումբներին, քաղաքացիական հասարակության կազմակերպություններին, մասնագիտական կազմակերպություններին, ավագ դպրոցի աշակերտներին և ուսուցիչներին, գիտնականներին, հետազոտողներին, լրագրողներին, հրատարակիչներին, նկարիչներին, սպորտային ակումբներին, մարզիկներին, գործարար հաստատություններին և տեղական իշխանություններին՝ համապատասխան ոլորտում և

գործունեության համապատասխան շրջանակներում հարևան երկիր ճանապարհորդելու համար:

բ) Հայաստան-Թուրքիա ճանապարհորդական դրամաշնորհը կաջակցի համապատասխան գործողությունների իրականացմանը բազմաբնույթ թեմատիկ ոլորտներում, ինչպիսիք են քաղաքացիական հասարակությունը, երիտասարդության և կամավորության վերաբերյալ քաղաքականությունները, մարդու իրավունքները և ժողովրդավարությունը, կրթությունը և ուսուցումը, շրջակա միջավայրը, պատմությունը, մշակույթն ու արվեստը, զարգացումը, գենդերը, բժշկությունը, իրավաբանությունը, տեխնոլոգիաները, սպորտը, տարածաշրջանային համագործակցությունը, եվրոպական ինտեգրացիան և այլն:

գ) Հայաստան-Թուրքիա ճանապարհորդական դրամաշնորհը կաջակցի անհատների և խմբերի, ովքեր կազմակերպում կամ մասնակցում են տարբեր տեսակի գործողությունների, ինչպիսիք են գործընկերության հիմնումը և ցանցային համագործակցությունը, ծրագրային պլանավորման այցերը, միջսահմանային ծրագրերը, ծրագրերի նախապատրաստական հանդիպումները, փոխանակման ծրագրերը, դասընթացները, լեզվի ուսուցումը, գիտական համագործակցությունը, հետազոտություններ անցկացնելը և թեկնածուական աշխատանքները, քաղաքացիական հասարակության կազմակերպություններում կամավորական աշխատանքը, համատեղ ստեղծագործական աշխատանքները, ինչպես նաև վերոնշյալ թեմատիկ ոլորտներում քննարկումների, համաժողովների, սեմինարների, ցուցահանդեսների, համերգների և նմանատիպ միջոցառումների կազմակերպումը կամ մասնակցությունը:

8. Հայաստան-Թուրքիա ճանապարհորդական դրամաշնորհի ստանալու համար չկա տարիքային սահմանափակում: 18 տարին չլրացած անձիք (իրավական չափահասության տարիքը Հայաստանում և Թուրքիայում) պետք է հայտին կից ներկայացնեն ծնողների, օրինական խնամակալների կամ ուսուցիչների թույլտվությունը: Հարևան երկիր այցի ժամանակ նրանց պետք է ուղեկցի 18 տարին լրացած չափահաս անձ:

Ովքե՞ր չեն կարող օգտվել Հայաստան-Թուրքիա ճանապարհորդական դրամաշնորհից:

9. Շահույթ հետապնդող կազմակերպությունների, առևտրային ձեռնարկությունների, գործարար հաստատությունների ճանապարհորդությունները, որոնց նպատակը ապրանքների և ծառայությունների վաճառքն է, քաղաքական կուսակցությունների ճամփորդությունները, տուրիստական և անձնական այցերը, ինչպես նաև բուժման նպատակով կատարվող այցերը թույլտարելի չեն:

10. Հրանտ Դինք հիմնարկի, ինչպես նաև գործընկեր կազմակերպության՝ Գյումրու «Երիտասարդական նախաձեռնությունների կենտրոն» (ԵՆԿ) ՀԿ-ի ներկայիս և նախկին

աշխատակիցների, անդամների և խորհրդի անդամների, ինչպես նաև «Աջակցություն Հայաստան-Թուրքիա հարաբերությունների կարգավորմանը. միջսահմանային կապերի ամրապնդում» ծրագրի կոնստրցիումի անդամների այցելությունները և/կամ վերոնշյալ կազմակերպությունների գործունեության շրջանակում կատարվող ճանապարհորդությունները թույլատրելի չեն: Սույն դրույթի շրջանակում «ԵՆԿ անդամներ» հասկացությունը վերաբերում է բացառապես այն անձանց, որոնք կազմակերպությունում ունեն ֆինանսական վարձատրություն կամ որոշում կայացնելու լիազորություն: Ընդհանուր անդամակցությունը խոչընդոտ չի հանդիսանում ճանապարհորդական դրամաշնորհին դիմելու համար:

11. Անհատները, ովքեր նախկինում ստացել են աջակցություն Հրանտ Դինք հիմնարկի կողմից՝ Հայաստան կամ Թուրքիա այցելելու համար, չեն կարող օգտվել ճանապարհորդական դրամաշնորհից:
12. Այն անհատները, որոնք արդեն ստացել են աջակցություն Հայաստան-Թուրքիա ճանապարհորդական դրամաշնորհի նախորդ փուլերում, չեն կարող կրկին օգտվել ճանապարհորդական դրամաշնորհից: Անհատները, որոնք նախորդ փուլերում ստացել են ճանապարհորդական դրամաշնորհ, սակայն չեն կարողացել իրականացնել իրենց ճանապարհորդությունը արտակարգ իրավիճակների պատճառով, կարող են կրկին դիմել՝ ուղարկելով նախկին հայտադիմումը կամ նորը:
13. Հայաստան-Թուրքիա ճանապարհորդական դրամաշնորհից հնարավոր է օգտվել միայն մեկ անգամ: Ճանապարհորդական դրամաշնորհը չստանալու դեպքում նույն անձը կարող է դիմել հաջորդ փուլերին՝ այլ հայտադիմումով:
14. Հայտադիմումը պետք է ներկայացվի անհատների կողմից: Խմբային ճանապարհորդությունների դեպքում խմբի յուրաքանչյուր անդամ պետք է ներկայացնի անհատական հայտադիմում՝ հայտի համապատասխան բաժնում մանրամասնելով խմբի մասին տեղեկատվությունը: Խմբային հայտերի դեպքում խմբի մասնակիցների թիվը չպետք է գերազանցի 3 (երեք) անձը, և յուրաքանչյուր մասնակցի դերը պետք է հստակ ներկայացվի համապատասխան հայտադիմումում:

Ի՞նչ ծախսեր է հոգում Հայաստան-Թուրքիա ճանապարհորդական դրամաշնորհը:

15. Հայաստան-Թուրքիա ճանապարհորդական դրամաշնորհը հոգում է ճանապարհածախսը, որի համար հարկավոր է ներկայացնել համապատասխան փաստաթղթեր (ինքնաթիռի, գնացքի, ավտոբուսի տոմսեր): Հայաստան-Թուրքիա ճանապարհորդական դրամաշնորհը կհոգա միայն էկոնոմ դասի տոմսերի և հասարակական տրանսպորտի ծախսերը:

16. Ճանապարհորդության ընթացքում տեղական և միջազգային տրանսպորտային ծախսերը, որոնք բխում են ծրագրի նպատակներից, կվճարվեն Հրանտ Դինք հիմնարկի կողմից ուղիղ համապատասխան ավիաընկերությանը կամ ճանապարհորդական գործակալությանը: Ճանապարհորդական դրամաշնորհառուների տոմսերը կտրամադրվեն Հրանտ Դինք հիմնարկի կողմից:

17. Այն դեպքերում, երբ հնարավոր չէ Հրանտ Դինք հիմնարկի կողմից անմիջականորեն ամրագրել և վճարել տոմսերի, մասնավորապես՝ միջքաղաքային տրանսպորտի համար, ինչպիսիք են օրինակ Երևան-Գյումրի և Երևան-Թբիլիսի ուղևորությունները, ճանապարհորդական դրամաշնորհառուն կարող է ինքնուրույն վճարել այդ ծախսերը: Նման դեպքերում ճանապարհորդական դրամաշնորհառուն կարող է փոխհատուցում պահանջել Հրանտ Դինք հիմնարկից: Փոխհատուցում ստանալու համար պետք է բավարարել հետևյալ պահանջները.

ա) Միջքաղաքային ճանապարհորդությունը պետք է իրականացվի էկոնոմ դասի հասարակական տրանսպորտով:

բ) Բոլոր իրավական փաստաթղթերը, անդորրագրերն ու ստացականները, որոնք վկայում են կատարած միջքաղաքային ճանապարհորդության մասին, ինչպես նաև ճանապարհորդական դրամաշնորհի շրջանակներում գործունեության հաշվետվությունը դրամաշնորհառուն պետք է ներկայացնի Հրանտ Դինք հիմնարկին՝ հայրենիք վերադառնալուց հետո 10 (տասը) օրվա ընթացքում:

18. Հայաստան-Թուրքիա ճանապարհորդական դրամաշնորհը չի ֆինանսավորում վիզայի ծախսերը, ելքի վճարներն ու տուրքերը, ճանապարհորդական ապահովագրությունը կամ այցի հետ կապված այլ ծախսեր՝ ներառյալ կացարանը, սնունդը և այլն: Այս ծախսերը հոգում է Հայաստան-Թուրքիա ճանապարհորդական դրամաշնորհի շահառուն ինքը կամ հրավիրող անձը և/կամ կազմակերպությունը:

19. Հայաստան-Թուրքիա ճանապարհորդական դրամաշնորհի աջակցությամբ Հայաստան կամ Թուրքիա մեկնող անձանց խորհուրդ է տրվում ձեռք բերել ճանապարհորդական ապահովագրություն, որը կգործի ճամփորդության ողջ տևողության ընթացքում: Ճամփորդական առողջության ապահովագրության կազմակերպման միակ պատասխանատվությունը ստանձնում է դրամաշնորհառուն: Հրանտ Դինք հիմնարկը, «Աջակցություն Հայաստան-Թուրքիա հարաբերությունների կարգավորմանը. միջսահմանային կապերի ամրապնդում» ծրագրի կոնսորցիումի անդամներն ու Եվրոպական միությունը պատասխանատվություն չեն կրում այցելության ընթացքում տեղի ունեցող որևէ միջադեպի դեպքում:

Ընտրության չափանիշները

20. Ընտրության հիմնական չափանիշը նպաստելն է ծրագրի ընդհանուր նպատակի իրականացմանը, որն է՝

«Աջակցել քաղաքացիական հասարակության ջանքերին՝ ուղղված Հայաստան-Թուրքիա հարաբերությունների կարգավորմանն ու փակ սահմանների բացմանը՝ մարդկային կապերը զարգացնելու, տնտեսական ու գործարար կապերն ընդլայնելու, մշակութային և կրթական ծրագրեր իրականացնելու, ինչպես նաև երկու հասարակություններում համաչափ տեղեկատվություն ապահովելու միջոցով»:

Ընտրության առաջնայնությունները

21. Ընտրության հիմնական չափանիշից բացի՝ առաջնահերթություն կտրվեն հետևյալ հատկանիշներին համապատասխանող հայտերին.

ա) Աջակցություն առաջին անգամ մեկնողներին. առաջնահերթություն կտրվի այն անհատներին, ովքեր առաջին անգամ են ճանապարհորդում հարևան երկիր:

բ) Աջակցություն տեղական և շրջանային գործունեության համար. Հայաստան-Թուրքիա ճանապարհորդական դրամաշնորհի նպատակն է մոբիլիզացնել անհատներին և կազմակերպություններին ոչ միայն խոշոր քաղաքներից, այլ նաև գյուղական վայրերից: Այդ պատճառով առաջնահերթությունը տրվելու է Ստամբուլից և Երևանից բացի այլ քաղաքներում տեղային գործունեություն ծավալելու նպատակով իրականացվող ճանապարհորդություններին:

գ) Բազմազանություն. կապահովվի սեռի, տարիքի, աշխարհագրական տարածքի, թեմատիկ ոլորտի և գործունեության տեսակների առումով շահառուների բազմազանությունը:

դ) Աջակցություն երիտասարդությանը. Հայաստան-Թուրքիա ճանապարհորդական դրամաշնորհին կարող են դիմել բոլոր տարիքային խմբերը, սակայն առաջնահերթություն կտրվի երիտասարդներին՝ ներառյալ ավագ դպրոցի աշակերտներին, բուհի ուսանողներին և երիտասարդական խմբերին:

ե) Աջակցություն նոր նախաձեռնություններին. Հայաստան-Թուրքիա ճանապարհորդական դրամաշնորհը կաջակցի որոշակի ոլորտներում մասնագիտացած, իրավական գրանցում ունեցող քաղաքացիական հասարակության կազմակերպություններին, ինչպես նաև իրավական կարգավիճակ չունեցող նախաձեռնություններին: Առաջնահերթություն կտրվի նորարարական գաղափարներ ներկայացրած քաղաքացիական նախաձեռնություններին և անհատներին:

զ) Կայունություն և բազմաբևեռված ազդեցություն. առաջնահերթություն կտրվի այն ճանապարհորդություններին, որոնք ավելի շատ մարդկանց կարող են ընդգրկել և ավելի

մեծ ազդեցություն կարող են ունենալ երկարաժամկետ հեռանկարում՝ նպաստելով Թուրքիայի և Հայաստանի միջև հստակ գործընկերային ծրագրերին:

Ընտրության գործընթացը

22. Հայաստան-Թուրքիա ճանապարհորդական դրամաշնորհին ներկայացված բոլոր հայտերը գնահատվում են ընտրող հանձնաժողովի կողմից՝ ընտրության չափանիշներին և առաջնահերթություններին համապատասխան: Ընտրող հանձնաժողովը կազմված է անկախ, չեզոք և փորձառու վեց անդամից՝ երեքը Թուրքիայից, երեքը՝ Հայաստանից: Հանձնաժողովի անդամների ընտրությունը կատարվում է Հրանտ Դինք հիմնարկի կողմից: Ընտրող հանձնաժողովի կազմը ձևավորելիս ուշադրություն է դարձվում գենդերային հավասարությանը: Ընտրող հանձնաժողովի անդամները իրենց գործառույթներն իրականացնում են կամավոր հիմունքով:
23. Ընտրող հանձնաժողովի անդամները կգնահատեն Հայաստանից և Թուրքիայից ստացած բոլոր հայտերը՝ 10 բալային համակարգով: Միջինից բարձր միավոր հավաքած դիմումները կստանան ճանապարհորդական դրամաշնորհ: Գնահատումը կատարվում է միասնական կարգով, այլ ոչ՝ Հայաստանից և Թուրքիայից ստացած հայտերի առանձին գնահատմամբ:
24. Ընտրող հանձնաժողովի անդամները վետոյի իրավունք ունեն: Ընտրող հանձնաժողովի անդամները կգնահատեն ընտրության ժամանակացույցում մատնանշված յուրաքանչյուր ժամանակահատվածի համար ստացած հայտերը յոթ (7) օրվա ընթացքում:
25. 2026-2027 թթ. ընտրող հանձնաժողովի անդամներն են Բուրջու Բեջերմենը, Դիքրան Ալթունը, Էվրեն Էրգեչը, Գայանե Մկրտչյանը, Գեղամ Վարդանյանը և Մարինե Կարոյանը:

Հայաստան-Թուրքիա ճանապարհորդական դրամաշնորհի ընտրության ժամանակացույց

26. 2026 թ. սեպտեմբերից մինչև 2027 թ. հուլիս Հայաստան-Թուրքիա ճանապարհորդական դրամաշնորհից օգտվելու ցանկություն ունեցող անհատները կարող են ներկայացնել իրենց հայտերը ցանկացած ժամանակ՝ 2026 թ. հունիսից մինչև 2027 թ. ապրիլն ընկած ժամանակահատվածում: Հայտերի գնահատումը և արդյունքների հայտարարումը տեղի կունենա ըստ ստորև ներկայացված ժամանակացույցի: Ընտրող հանձնաժողովը դրամաշնորհառուների վերաբերյալ իր որոշումները կայացնում է 5 փուլով՝ ստորև ներկայացված ընտրության ժամանակացույցում նշված կոնկրետ ժամկետներում:
27. Հայտատուները պետք է կազմակերպեն իրենց ճանապարհորդությունը՝ համաձայն ներքոնշյալ ճանապարհորդական ժամանակացույցի, և հայտեր ներկայացնեն համապատասխան փուլի համար: Հետևաբար հայտը ներկայացնելիս/լրացնելիս հայտատուները կարող են ընտրել ճանապարհորդության միայն այն ժամկետները, որոնք համապատասխանում են տվյալ փուլին: Ճանապարհորդությունը կարող է տևել ավելի

երկար, քան յուրաքանչյուր փուլի համար նշված ժամանակահատվածը՝ երկարաժամկետ ծրագրերի կամ պատշաճ կերպով արդարացված լինելու դեպքում:

Ընտրության ժամանակացույց

Հայտերի ընդունման փուլեր	Հայտերի ընդունման ժամանակահատված	Ընտրված դրամաշնորհառուների հայտարարում	Ճանապարհորդության թույլատրելի ժամանակացույց
27	15 հունիս - 31 հուլիս 2026	15 օգոստոս 2026	25 օգոստոս - 30 նոյեմբեր 2026
28	1 օգոստոս - 30 սեպտեմբեր 2026	15 հոկտեմբեր 2026	25 հոկտեմբեր - 31 հունվար 2026
29	1 հոկտեմբեր - 30 նոյեմբեր 2026	15 դեկտեմբեր 2026	25 դեկտեմբեր - 31 մարտ 2027
30	1 դեկտեմբեր 2026 - 31 հունվար 2027	15 փետրվար 2027	25 փետրվար - 31 մայիս 2027
31	1 փետրվար - 31 մարտ 2027	15 ապրիլ 2027	25 ապրիլ - 31 հուլիս 2027

28. Հայաստան-Թուրքիա ճանապարհորդական դրամաշնորհը կաջակցի միայն 2026 թ. օգոստոսի 25-ից մինչև 2027 թ. հուլիսի 31-ն իրականացվող ճանապարհորդությունները: 2027 թ. հուլիսի 31-ից հետո իրականացվող այցերի դեպքում ճանապարհորդական դրամաշնորհի աջակցություն չի կարող տրամադրվել:

Հայտերի ներկայացման գործընթացը

29. Ցանկացած հայտատու, ով ցանկանում է օգտվել Հայաստան-Թուրքիա ճանապարհորդական դրամաշնորհից, պետք է լրացնի առցանց հայտադիմումը, որը տեղակայված է www.hrantdink.org կայքում: Հայտերը պետք է լրացնել անգլերենով, սակայն անգլերենի իմացությունը ընտրության չափանիշ չի հանդիսանում: Հայտերը անգլերենով լրացնելը նպատակ ունի կանխել հնարավոր տարաձայնությունները թարգմանության վերաբերյալ և հեշտացնել ընտրող հանձնաժողովի աշխատանքը: Եթե հայտատուները հայերենից/թուրքերենից անգլերեն թարգմանության աջակցության կարիք ունեն, կարող են դիմել Հրանտ Դինք հիմնարկի ծրագրային թիմի աշխատակիցներին՝ խորհրդատվության համար:
30. Հայտատուները պարտավոր են նշել առնվազն մեկ կոնտակտային/երաշխավորող անձ և/կամ կազմակերպություն հարևան երկրում, որը կապ ունի առաջարկվող ճանապարհորդության նպատակի հետ և ծանոթ է հայտատուի նախատեսվող գործողություններին: Խնդրում ենք նկատի ունենալ, որ ծրագրային թիմը կապ կհաստատի հայտադիմումում հայտատուի կողմից նշված կոնտակտային/երաշխավորող անձի կամ կազմակերպության հետ՝ համոզվելու համար, որ նշված անձինք/կազմակերպությունները տեղեկացված են և պատրաստ են աջակցել

հայտատուին ծրագրի ընթացքում, եթե հաստատվի վերջինիս հայտը ճանապարհորդական դրամաշնորհ ստանալու համար:

31. Հրանտ Դինք հիմնարկի ծրագրային թիմի անդամները կհավաքեն բոլոր ներկայացված հայտերը, կիրականացնեն տեխնիկական գնահատում՝ պարզելու արդյոք հայտը ամբողջական է: Այնուհետև հայտերի ցանկը կուղարկվի ընտրող հանձնաժողովին:
32. Ընտրող հանձնաժողովի գնահատումից հետո Հայաստանից և Թուրքիայից ստացված բոլոր հայտերը դասավորվում են բալերի նվազման կարգով: Միջինից բարձր միավոր ստացած հայտատուները, որոնք կմտնեն 2026-2027 թթ. թիրախային թվաքանակի մեջ, կճանաչվեն Հայաստան-Թուրքիա ճանապարհորդական դրամաշնորհի շահառու:
33. Դրամաշնորհառուներն ընտրության արդյունքներին կծանոթանան էլեկտրոնային նամակով՝ ըստ վերոնշյալ ժամանակացույցի: Ճանապարհորդությունները կարող են սկսվել միայն շահառուների ընտրության մասին հայտնելուց հետո՝ համաձայն վերը նշված ճանապարհորդության թույլատրելի ժամանակացույցի: Դրամաշնորհ չստացած հայտատուները Հրանտ Դինք հիմնարկի կողմից կտեղեկացվեն էլեկտրոնային նամակի միջոցով:
34. Հայաստան-Թուրքիա ճանապարհորդական դրամաշնորհի շահառուները պարտավոր են նախ հաստատել իրենց այցի ամսաթվերը և ճանապարհորդության ուղին ծրագրային թիմին, կնքեն Հայաստան-Թուրքիա ճանապարհորդական դրամաշնորհի համաձայնագիրը Հրանտ Դինք հիմնարկի հետ և այցից ամենաուշը 5 օր առաջ Հրանտ Դինք հիմնարկին հանձնեն համաձայնագրի օրինակը: Դրանից հետո միայն Հրանտ Դինք հիմնարկը կկատարի ճամփորդական տոմսի ամրագրումները և կուղարկի գնված տոմսերը դրամաշնորհառուներին: Եթե շահառուները չեն հաստատում իրենց այցի ամսաթվերը և ճանապարհորդության ուղին տվյալ փուլի համար հատկացված թույլատրելի ժամանակահատվածում, ապա ծրագրային թիմը իրավունք ունի զրկել նրանց դրամաշնորհից:
35. Դրամաշնորհառուն ինքն է պատասխանատու հարևան երկիր այցելելու նպատակով մուտքի թույլտվության և դրանով նախատեսված ժամկետների և այլ պահանջների կատարման համար: 2026 թ. սկսած՝ Թուրքիայի հատուկ անձնագրեր ունեցող քաղաքացիներից այլևս չի պահանջվում լրացուցիչ ընթացակարգ կամ հատուկ թույլտվություն՝ հարևան երկիր մուտք գործելու համար: Այնուամենայնիվ, ճանապարհորդներին խորհուրդ է տրվում նախապես ճշտել մուտքի գործող պահանջները:
36. Այն դեպքում, երբ Հայաստան-Թուրքիա ճանապարհորդական դրամաշնորհի ընտրված շահառուներն, ովքեր, ստորագրած լինելով Հայաստան-Թուրքիա ճանապարհորդական դրամաշնորհի համաձայնագիրը, չեն կարող իրականացնել իրենց այցը հարևան երկիր և Հրանտ Դինք հիմնարկին չեն տեղեկացնում այդ մասին առնվազն 3 (երեք) օր առաջ, Հիմնարկն անհրաժեշտ քայլեր կձեռնարկի այցի համար ծախսված միջոցները վերականգնելու համար՝ Հայաստան-Թուրքիա ճանապարհորդական դրամաշնորհի համաձայնագրի կետերին համաձայն:

37. Այն դեպքում, երբ Հրանտ Դինք հիմնարկի ծրագրային թիւը բացահայտի հայտատուի կողմից ներկայացված թերի կամ իրականությանը չհամապատասխանող տեղեկություն, Հիմնարկին իրավունք է վերապահվում կասեցնել հայտադիմումը ընտրության գործընթացի ցանկացած փուլում, ներառյալ այն դեպքերը, երբ հայտատուի անունը հայտարարվել է որպես դրամաշնորհառու: